

die Natur / wie der Poet sagt / die Menschen gelert hat / das man die Heuser ahn einander  
pawet / damit an zuzeigen / das keiner des andern wol geraten kün / sündert Je einer des andern  
nottürfftig sey / vnd ein jlicher dem andern / nach seinem verstande / gaben / vnd geschicklicheit  
also dienen soll / bis das wir alle vndereinander zu Gottes erkantnis / lob / preis / ehr / forcht / vnd  
lieb gebracht werden.

Nach dem mir dan Gott der Almechtig (on rhumb zu melden) auch ein kleines küncklein sei-  
ner gnaden vnd gaben / jhn der lieblichen kunst der Musica / vmb mein mühe arbeit / vnd fleis  
so ich lange zeit / tag vnd nacht / darauff gewendt hab / vergunt / vnd auß sundern gnaden mit  
gedeylt hat / dem ich dafür auch lob vnd danck sag / hab ich die also allein inn verporgen / bey  
mir nicht verhalten sollen noch wollen / sündert mich der selbigen also gebrauchen / damit sich  
auch andern liebhabern der Musica / zu freude / lust / nutz vñ guten gereichen vñ gedeyen möcht /

Bin derhalben vor wenig Jaren nicht zeitliche / ehr / ruhm / noch glori dardurch zuerlangen  
sündert auß angezeigten vnd gemelten vrsachen / verursacht / vnd gemüssigt worden / etliche  
tabulatur / auff Lautten vnd Geigen / so gut ich die selbigen dazumal hab haben / vnd bekünnen  
kinnen / durch den truck auß zugehn lassen / jhn sündertheit / der vnmüssigen Jugend damit zu  
dienen / welche offtmals / durch diese vñ dergleichen exercitia / von vielen schedlichen vñ  
greulichen lastern / auch bösen begirden vnd lüsten abgezogen / vnd zu ehlichern / vñ heyligern  
gedancken / geführt vnd gereicht wirdt / Darumb dan auch fürnemlich / alle Musica instrumen-  
ta / In Kirchen vnd Heusern / erfunden vnd erdacht sein / wie solches klerlich außweyßt vnd  
bezeugt / das schöne exempel Davidis / welches geschriben ist / ihm ersten Buch Samuelis am  
16 capitel / do David offtmals / den bösen geist / so den König Saul sehr vñrühig macht / mit  
seinem seitten spiel / verjagt vnd außtribe / dan also sagt der text. Wan nuhn der geyst Gottes  
ober